

Апостол 13.10.2024

**Б:** Мир всем.

**Я:** И духови твоему.

**Б:** Премудрость.

**Я:** Прокимен глас 7:

Господь крепость людем Своим даст, / Господь  
благословит люди Своя миром.

**Хор:** Господь крепость людем Своим даст ....

**Я:** Принесите Господеви сынове Божии, принесите  
Господеви сыны овни.

**Хор:** Господь крепость людем Своим даст ....

**Я:** Ин Прокимен, глас 7:

**Я:** Восхвалятся преподобнии во славе, / и  
возрадуются на ложах своих.

**Хор:** Восхвалятся преподобнии во славе ....

**Б:** Премудрость.

**Я:** к коринфяном послание святого Апостола Павла  
чтение.

**Б:** Вонмем

**Братие,** поспешствующе молим, не вотще благодать  
Божию прияти вам. Глаголет бо: во время приятно  
послушах тебе, и в день спасения помогах ти. Се ныне  
время благоприятно, се ныне день спасения. Ни едино  
ни в чемже дающе претыкание, да служение безпорочно

будет, но во всем представляюще себе якоже Божия  
слуги, в терпении мнозе, в скорбех, в бедах, в теснотах,  
в ранах, в темницах, в нестроениях, в трудех, во  
бдениих, в пощениих, во очищении, в разуме, в  
долготерпении, в благости, в Дусе Святе, в любви  
нелицемерне, в словеси истины, в силе Божией, оружии  
правды десными и шуими, славою и безчестием,  
гаждением и благохвалением, яко лестцы, и истинни,  
яко незнаеми, и познаваеми, яко умирающе, и се живи  
есмы, яко наказуеми, а не умерщвляеми, яко скорбяще,  
присно же радующесея, яко нищи, а многи богатяще, яко  
ничтоже имуще, а вся содержаще.

\*( 2 Кор 6:1–10, зач. 181)

**Братие,** бодрствуйте, стойте в вере, мужайтесь,  
утверждайтесь. Вся вам любовью да бывают. Молю же  
вы, братие: весте дом Стефанинов, яко есть начаток  
Ахаии, и в служение святым учиниша себе, да и вы  
повинуетеся таковым и всякому споспешствующу и  
труждающуся. Возрадовахся же о пришествии  
Стефанинове и Фуртунагове и Ахаикове, яко ваше  
лишение сии исполниша. Покоиша бо мой дух и ваш.  
Познавайте убо таковыя. Целуют вы церкви Асийския.  
Целуют вы о Господе много Акила и Прискилла с  
домашнею их церковию. Целуют вы братия вся.  
Целуйте друг друга лобзанием святым. Целование моею  
рукою Павлею. Аще кто не любит Господа Иисуса  
Христа, да будет проклят, маран афа. Благодать Господа

нашего Иисуса Христа с вами, и любви моя со всеми  
вами о Христе Иисусе. Аминь.

**\*( 1 Кор 16:13–24, зач. 166)**

**Б:** Мир ти.

**Я:** И духови твоему.

**Б:** Премудрость.

**Я:** Аллилуиа глас 7

**Я:** Благо есть исповедаться Господеви и пети Имени  
Твоему, Вышний.

**Хор:** Аллилуиа 3 раза

**Я:** Возвещати заутра милость Твою, и истину Твою на  
всяку ночь.

**Хор:** Аллилуиа 3 раза

**Я:** Священницы Твои облекутся в правду, и  
преподобнии Твои возрадуются.

**Хор:** Аллилуиа 3 раза